

金

石

萃

編

金石萃編卷一百十三

賜進士出身 誥授光祿大夫禮部右侍郎加七級王昶撰

唐七十三

馮宿碑

碑連額高一丈八寸廣四尺三寸三分四十一行行八十三字正書篆額在西安府

大唐故銀青光祿大夫檢校禮部尚書使持節梓州諸軍事兼梓州刺史御史大夫充劍南東川節度副大使知節度事管内觀察處置靜戎軍等使上柱國長樂縣開國公食邑一千五百戶贈吏部尚書馮公神道碑銘并序

銀青光祿大夫守兵部尚書充 皇太子侍讀兼判

太常卿事上柱國晉陽縣開國子食邑五百戶王起

撰

翰林學士朝議大夫守諫議大夫知 制誥上柱國

河東縣開國男食邑三百戶賜紫金魚袋柳公權書

并篆額

惟唐開成元年歲在執徐十二月三日檢校禮部尚書

東川節度使長樂公享年七十薨于位 天

子不視朝一日贈以天官之秩是月 公之喪歸于西

都其來也梓潼之人如亡顧復其至也京師之人咸嗟

歿瘁其親戚彌于中唐而隣里感其朋友慟于外寢而
搢紳弔咸以 公孝友忠信清廉正直寬仁偉度可以
韜當世弼諧遠畧可以經大邦而位不充量才屈於筭
斯所以感人深矣其明年五月克葬于京地萬年縣崇
道鄉白鹿原從先人塋禮也既葬其孤孀然泣血以

公勲伐德善之狀請被於文而刻此石云 公諱宿字
拱之冀州長樂人漢光祿勲奉世廿五代孫也自光祿
勲立功於漢其下十四葉立國王燕是謂昭口皇帝其
下七葉生五代祖周烏氏侯諱早惠口隋爲口州司戶
皇朝爲婺州長山令長山生高祖 皇婺州紉曹掾

諱文儉，紉曹生曾祖。茂才高第，栢州松陽令。諱道儀，松陽生。大父文林郎宋王府記室叅軍贈禮部員外郎諱嗣員外生先府君南昌令新安郡長史贈尙書左僕射諱子華，咸以茂德光耿，史諫僕射天寶中。

明皇以四子列學官，時真計偕一鳴上第，藏器不耀，以孝節聞。享年八十，累贈尙書左僕射先妣彭城劉氏。

皇成都府叅軍沔之，女嬪則母範，惟家之肥，累贈彭城郡太夫人。公卽僕射之元子也，奇偉倜儻，與人誠直言，無詭隨行，不苟合望之也。長戟森於武庫，卽之也。大珪植於瓊田，卅歲侍僕射府君廬，于員外府君之墓左。

有靈芝產于埏隧白兔擾于松楸僕射惡其顯異抑而
不言識者咸謂純孝殊祥又重之以陰德其門必大也
弱冠以工文碩學稱年廿六舉進士是時明有司卽兵
部侍郎陸公贊其人也又應宏詞科試百步穿楊萊賦
雖口勢奪而其文至今諷之後生以爲楷已而有志於
四方歷東諸侯爲彭門僕射張公建封所器異因表爲
試太常寺奉禮郎充節度口官張公傑邁簡達尊賢禮
能幕府始建羣彥翹首與 公同昇者李藩韓愈之口
皆諸侯之選及 公曳裾之後有置醴之遇其書檄奏
記 公皆專焉及張公寢疾 公常出八卧內獻口戎

事一軍感其口明迨其薨落也武夫感義闔里懷慕蚩
蚩洵洵無師乃亂口其子惜稱留後焉未 王命

也先是李師古之叛也其將李洧以徐方効順至是師
古將伐有壅且復故地公內則整訓叛徒明利害之鄉
外則移檄敵人口逆順之理卒能寢師古之謀遏徐方
之亂衛監戎於鋒刃之上口闔境於磔裂之勢 公口
力口而終身杜口不言定徐之功議者高其不伐及

德宗以情得衆因而善之表 公爲留後判

官試金吾衛兵曹 公以危邦是戒倚門方切乞歸江

左以奉色養已而起師潛章請口口幄授大理評事徐

之軍吏聞 公之去羣口 公職者害 公之能也合
爲他誣貶泉州司戶 公得喪不形以詩書自娛歲餘
移口州司戶太夫人終堂瑪墓柴毀阼於滅性寔復常
從事浙右徵拜憲府監察歷太常博士凡爲八家定口
皆口善口惡不吐不茹時人偉其文而與其直遷虞部
員外郎丁先府君艱藥棘在疚哀禮皆極旣祥除都官
員外郎 憲宗時吳元濟以淮西叛 詔相
國裴公東征於是妙選廷臣爲幕中口由是口 公爲
彰義軍節度判官於是有朱紱銀章之錫淮西平疇勞
報功拜比部郎中爲持權者所忌會韓文公愈以京師

迎佛骨上疏切諫忌 公者因

上之怒也

誣 公實爲之出判歙州先是中書舍人缺僉謂 公
之述作動合暮訓 綸言之任旦夕待遷及一麾出守
羣情大駭 公則神怡氣暢視虧若成此則老氏之齊
寵辱令尹之無愠喜也在歙周歲鋤兼并活矜寡有禱
袴誰嗣之謠徵拜口部郎中遷口部郎中知 制誥時
問罪河朔書命疊委 公應口神速不能自休詞理典
與文采煥逸大凡六百餘章爲染翰者程準

天子以深州刺史口元口納忠効順 詔除襄州節
度使時重圍不口未口之口口江漢一游舟車四會人

虛口沸菴素由之口思文武全德姑口其口

上曰侍臣有魁岸奇表珥貂蟬者爲誰丞相以

公對

上曰峴南留務斯人可矣爰命金

印紫綬宮相憲丞倅口以口口之口車則率旅口口口

里口口口口翼日口口口詔口歸口口口或領借口

口上口一年或追送君口有逾百里其遺愛在去有如

此者卽日拜中書舍人妄爲飛語口中口改爲太常口

口口口口遷散騎常侍口口口口直口口口之士

口口口口口口試第其上下得人之口口爲至公遷華

州刺史以州名犯先公諱固讓不拜復口口加集賢殿

學士□□□□同之阻 命於□□也王□興□□□

□□□□□□□□□□□□□□□□□□□□□□□□

□□□□之臣有才有宣撫之擇使數輩□□□□之事

公以食君之祿危事不□急國之□□□□盡心

遂□□政□□□□屬虐暑溽雨泥行谷宿□□險阻

□□□□□□□□□□□□□□□□□□□□□□□□

□危者安之□者勇之棧城□□ 公□□助其□□

事國有如此者矣三川浩穰尹正斯□時□之□□

公□理及□□必信賞必罰寬人急吏□□著無□兼

并□必□□□□□□□□□□□□□□□□□□□□□□

吏□□□□□於林下□□□□□□□□
□禁止再□報政行工部侍郎加□□□□□□
□□□□□□曹郎議□□公以□路□以誅□
□□□□□之□□□以為得□□□□□□□□
□□□□後勅五十□□百□□□□□□□□兵
部侍郎進爵為公會衆□□□□□□□□上□□
□□之忠重推轂之□□檢校禮部尙書使持節梓州
諸軍事兼梓州刺史御史大夫□□□□□□節度副
大使知節度事管內觀察處置靜戎軍□□□□公
□節□臨整□□紀外□□□內□□毗推赤心於三

軍之腹而□郡以六□□□禮樂修明苛□用去□□

□□□□□□人□□□□□□□□□□□□□□

□□□□□□□□□□□□□□□□□□□□□□

□□心太和初□師□□南□入綬哲于□□大掠而

□公以善□不□□□□□□隨則無惠安必□□□

□□□□□□□□□□□□□□□□□□□□□□

□□□□□□□□□□□□□□□□□□□□□□

日守土之臣當如是乎豈□山鎮一方亦可波及他□

詔用□□□□□巫之□□□□□公□□□□□□

□□□□□□□□□□□□□□□□□□□□□□

馬尙書碑今在陝西省下秦人王宏度酷嗜古墨余

問如此妙跡近在省會何以不多見搨本王云碑已

剝盡不可復搨每捫碑石輒欲涕流余亦爲之慨然

楊用脩曰誠懸馮尙書碑亞於廟堂碑

庚子翁
息記

右碑自授華州刺史以父諱不拜徙左散騎常侍兼

集賢殿學士而後皆殘泐其幸有者證之新舊二史

多異如碑云冀州長樂人史云黎州東陽人豈宿之

始祀漢光祿勳奉世立功于燕奉世之後文儉爲婺

州禮曹掾遂家東陽耶文儉者宿之高祖也五代祖

惠大父道儀皆史所遺碑云年廿六舉進士爲兵部

侍郎陸贄明人拜比部郎中時爲持權者忌以韓愈切諫迎佛骨表誣宿實爲之出爲劍州刺史舊書與碑同至碑題所謂梓州刺史及劍南東川副大使知節度事卽舊書亦未之詳也宿拜河南尹時洛苑使姚文壽縱部下侵欺百姓吏不敢捕宿于大會日遇而杖之死新史尙不之載其闕畧亦云多矣子三人圖陶韜皆登進士揚歷清顯新史止錄圖何也序之首云開成元年十二月三日宿薨于東川以明年五月歸葬于京兆萬年崇道鄉白鹿原之先塋則馬氏雖家婺州以宿之貴祖父俱葬咸陽其子孫或有存

者豐碑巨碣磨滅殆盡矣

金石錄補

觀韓昌黎與馮宿論文書時值唐文之衰馮公獨能
力進乎古爲昌黎所推許生無愧秩宗之官死而柳
公權爲之書碑今又列於泮宮馮公亦足以不朽矣

第碑移竟失墓所惜哉

來齊金石刻考畧

宿字拱之馮審之從兄也官終吏部尙書卒諡曰懿
起字舉之終太尉卒諡曰文

關中金石記

唐制諸王拜節度大使者皆留京師以副大使知節
度事者寔正節度也碑稱充劍南東川節度副大使
知節度事而新舊史但稱節度使者蓋以此舊史本

傳云韓愈論佛骨時宰疑宿草疏出爲歙州刺史新
史疑其未必然而刪之然碑云公爲比部郎中爲持
權者所忌會韓文公愈上疏切諫佛骨忌公者誣公
寔爲之出刺歙州則固有此事矣昌黎之文自後世
論之固非宿所能及在當時則猶夫人爾况出于忌
者之口亦何所不至哉史稱婺州東陽人而碑云冀
州長樂人蓋舉其族望然唐時冀州固無長樂縣劉
知幾所譏諒哉

潛研堂金
石文跋尾

碑後文磨蝕垂盡今獨前文存者尙可辨案碑云宿
冀州長樂人而新唐書本傳則稱婺州東陽人金石

續錄謂宜以碑爲正攷馮氏之所自出惟杜陵長樂
二望碑因以宿爲長樂北史馮跋傳亦云代本出長
樂宿北燕裔也今碑書其始望是也唐碑刻如池州
刺史馮仁碑云長樂馮文王之允與此碑同則碑信
非無據然驗其實宿之占籍當在婺州今文內所載
乞歸江左以奉色養當時自宿祖父並居東陽又宜
依新書爲是此固當兩存之不宜有所偏廢也張建
封旣歿宿以書說武俊使表建封子愔爲留後新唐
書云爾而碑獨記德宗以愔得衆聞而善之則愔之
得請亦不盡出自武俊碑載宿卅歲侍僕射府君廬

於員外府之墓左則宿與父子華並守墓矣而傳文
惟言子華廬親墓有靈芝白兔蓋史畧也新唐書牛
元翼徙節山南東道爲王庭奏所圍以宿總留事碑
云天子以深州刺史牛元翼納忠效順詔除襄州節
度時重圍不解未克之官下丞相以公對上曰峴南
留務斯人可矣文較史爲悉又碑載開成元年十二
月長樂公薨下又明年克葬云云碑之建立約亦在
是時矣至碑又云其親戚號于中唐金石續錄云唐
似是堂字案詩中唐有甓傳堂塗也尔疋釋宮廟中
路謂之唐此卽碑依用所自後漢書延篤傳少從穎

川唐蹊典司馬彪續漢書作堂蹊典堂與唐亦古通用字何爲疑哉

授堂金石跋

按此碑撰文者王起兩唐書傳起爲播弟字舉之大和七年由河中尹入爲兵部尙書八年檢校右僕射襄州刺史九年就加銀青光祿大夫文宗好文起僻于嗜學轉兵部尙書以莊恪太子登儲欲令儒者授經乃兼太子侍讀判太常卿碑結銜與傳同碑無建立年月以莊恪太子傳證之大和六年立爲皇太子開成三年詔宮臣詣崇明門謁朔望侍讀偶日入對起之兼太子侍讀當在是時則

碑立于開成二年亦一證也又据書碑之柳公權
結銜翰林學士守諫議大夫知制誥稽之本傳亦
在三年以前則又二年立碑之證也碑云開成元
年歲在執徐者是年爲丙辰歲也云克葬于京兆
萬年縣崇道鄉白鹿原元和郡縣志白鹿原在萬
年縣東二十里長安志云在萬年縣東南二十里
然崇道鄉名兩志所無也碑云公諱宿字棋之舊傳
無新傳漢光祿勳奉世廿五代孫自光祿勳立功
於漢其下十四葉立國王燕是謂昭口皇帝漢書
馮奉世傳昭帝末西河屬國胡伊酋畔奉世輒持

節將兵追擊代爲右將軍典屬國數歲爲光祿勳
晉書載記馮跋字文起以太元二十年僭稱天王
於昌黎不徙舊號卽國曰燕建元曰太元立十一
年入宋至元嘉七年卒又見魏書海夷傳語亦畧
同又据十三代孫馮元德撰昌黎馮王新廟碑稱
王諱熙伯祖諱跋建國北燕傳位于昭成皇帝諱
宏卽王之烈祖也然則此碑所稱昭口皇帝者卽
昭成帝馮宏也碑云五代祖諱早惠隋爲口州司
戶皇朝爲婺州長山令長山卽金華縣在漢爲烏
傷縣地後漢改爲長山歷代相因据唐書地理志

武德八年省長山縣入于金華縣屬婺州東陽郡
則早惠爲令尙在武德八年以前也此下高祖文

儉曾祖道儀大父嗣兩唐書俱無傳府君子華兩

書附宿傳亦但載其廬墓有靈芝白兔之祥與碑合

而不書其官南昌令新安郡長史此下碑敘宿事

云年廿六舉進士是時明有司卽兵部侍郎陸公

贊其人也舊書陸贊傳德宗貞元七年正拜兵部

侍郎知貢舉据昌黎文集與副部陸員外書云往

亦幸在得中云云孫汝聽注曰貞元八年陸贊知

舉賈稜等二十三人登第公與焉則是陸贊之知

貢舉在貞元八年元八年選士數年之內居臺省清近者十餘人

蓋以贊所舉號爲得人列贊門下者以爲榮故碑
特書之也碑又書應宏詞科試百步穿楊葉賦其
文至今諷之而兩傳不載昌黎集有與馮宿論文
書云辱示初筮賦實有意思但力爲之古人不難
到云云則宿之賦固爲昌黎所稱矣碑云彭門僕
射張公建封表爲試太常寺奉禮郎充節度判官
張公墓府始建羣彘翹首與公同昇者李藩韓愈
之徒皆諸侯之選云云宿傳但云徐州節度張建
封辟爲掌書記而不詳其餘唐書韓愈傳亦但云
徐州張建封請爲其賓位檢昌黎文集有徐泗豪

三州節度掌書記廳壁記云南陽公鎮徐州歷十一年而掌書記三人曰高陽許孟容曰京兆杜兼曰隴西李博而不及宿然張建封開幕府禮賢下士人才衆多不勝悉數則宿與昌黎同登進士同在幕府碑傳叅攷自可徵信可知昌黎與宿相聚日久交情更深是以與宿論文極爲推挹而佛骨諫疏宜乎忌者誣爲出于宿手矣碑稱宿試金吾衛兵曹授大理評事兩傳皆不載而傳有從浙東觀察使賈全府辟碑亦不載碑于貶泉州司戶後云歲餘移口州司戶

湖州

各 太夫人喪復常從事浙

右徵拜憲府監察傳皆畧之出刺欵州後徵拜口
部郎中遷口部郎中知制誥泐二字以傳攷之乃
刑部兵部也傳云太和二年拜河南尹在行工部
侍郎之前而碑泐不見宿嘗有詩酬白樂天劉夢
得云共稱洛邑難其選何幸天書用不才卽此時
作也碑雖泐尙存虐暑溽雨泥行谷宿三川浩穰
尹正斯口信賞必罰寬人急吏等累二百言皆尹
河南時事也碑于行工部侍郎之後有口口後勅
五十卷据傳則修格後勅三十卷碑傳三五互異
舊書經籍志不著錄新書藝文志有云太和格後

勅四十卷格後勅五十卷注云初前大理丞謝登纂凡六十卷詔刑部詳定去其繁複太和七年上而不云馮宿同修以時攷之卽碑所云格後勅五十卷也碑云兵部侍郎進爵爲公則必有初封縣侯之語而碑已泐于前舊傳不載新傳云累封長樂縣公亦不詳其初封也檢校禮部尙書之下碑有梓州刺史結銜四十餘字傳但以東川節度使一語括之此下舊傳已畢新傳則畧敘完城郭增兵械修利防庸等事而碑文全泐矣碑有二嘗一旦天助十萬錢于我家故鄉人號爲孝馮家吾今

壽登□□位列方面陰德之□其可誣乎天助十
萬錢兩傳俱不載宿卒年七十則壽登下是七十
也孝馮家三字見新書宿傳云父子華廬親墓有
靈芝白兔號孝馮家又見鄴中記云馮肅宿字
拱之黎州人廬親墓有靈芝白兔之瑞一時號曰
孝馮家而皆不及天助十萬錢之事碑已敘靈芝
白兔於前而未乃述十萬錢事爲孝馮家之緣起
惜碑上下文泐無從得其詳矣

大泉寺新三門記

碑高六尺三寸廣三尺四寸三分二行首行
三十六字餘皆三十七字行書篆額在句容縣

大唐潤州句容縣大泉寺新三門記 并序

鄉貢進士姚萇撰

當寺沙門齊操書

句曲之東寔曰崑峯居峯之陽厥生大泉寺因泉而題
焉後劉宋開明二年有邑令顏繼祖捨宅移寺南去泉
五里而遙年代寔遠碑記埋沒粗所詳者乃顏氏十三
代孫今寺之惠誠也大和初監寺僧惠明與寺僧道琳
等見三門破壞乃言於衆曰此教東流設象爲法牢落
如是瞻仰何依乃請今寺主僧常誼昔旅于是者戮力
誓心慕緣折化如響斯應人咸歸之遠近趨走投施委

積筭財度費功用果足乃革舊制恢新謀延袤縱廣中
闕無改自大和庚戌至于癸丑凡七年厥功告成崇軒
峨峨三閤其門飛簷翼張丹楹霞煥矧茲寺以重崗疊
嶺采入崖谷行樹葱翠煙蘿蒙密雲收霧卷宛若仙關
俾得道者同指歸於覺路由徑者詎深着於迷途非我
師之志誠其孰能逮於此今天下學佛道者多宗旨於
五臺靈聖蹤跡往往而在如吾黨之依於丘門也詎
本鄴人冠歲因往遊焉遂剃髮於五臺金閣寺元和再
歲乃於渭州龍興寺依年具戒振錫經行見色相之皆
空識衣珠之無價又六年始到江南初止於近寺蘭若

其明春又之嶺南詣禪訪道酌水步雲心契如期不遠
千里十一年還至茲寺初寺每有僧俗大會五千餘衆
號曰龍華常患錡金之器不同於用物有所闕人多告
勞誼乃發願鑄一大鑊求布金之長者得鎔範之良工
歸依一念之間成就堅牢之質濩落有用碩大無朋使
天人畢會於龍花香積普沾於法味由此故也寺衆僉
曰誼實有力於寺者非宿習德本沾諸善緣豈能誘掖
羣心終成喜捨大和初歲乃聞諸府邑請隸名焉繇是
三門荐興功致一貫則誼之行業前術推可鏡矣人有
語余於師爲文者誼因錄所事請識門焉寺之備新記

詳矣辭曰

寺之興 大泉是生 盛沸猶在 既温且靈 寺之
移 顏氏之基 宋室舊邑 栾野離離 寺之終
誼實是工 大鼎渠渠 三門崇崇 煙霞棟梁 松
桂香風 周迎巖壑 警迷其鍾 文若干石 播之
無窮

開成三年歲次戊午十一月乙卯廿六日庚辰立

西河郡樂縣慶鑄并記

勾當功德主寺主僧常誼

按此碑沙門齊操書不云篆額卽盛時泰元續記

載此碑亦不云有額。據潛研堂跋謂額中泉字篆
从日从水是有額。而此本失揭也。題稱潤州句容
縣新唐書地理志句容縣注云武德三年以句容
延陵二縣置茅州。七年州廢隸蔣州。九年隸潤州。
乾元元年屬昇州。舊書地理志寶應元年昇州廢
屬潤州。據舊書則寶應元年後不復再屬昇州。據
新書則乾元元年後不復改屬潤州。今此碑立于
開成三年。而句容屬潤州。則舊書爲有據也。碑云
句容之東實曰崙峯。江寧府志句容縣有崙山。在
縣東北五十里。東連駒驪山。四十二福地也。金陵

志唐肅宗時謁者伍達靈在此山得道去云云此碑極崱峯或卽崱山也碑文此下載崱之陽有大泉寺因泉而題劉宋時有邑令顏繼祖捨宅爲顏氏十三代孫又稱大泉寺僧俗大會五千餘衆號曰龍華寺僧常誼鑄一大鑊香積普沾大和初歲隸名府邑由是三門荐興功致一貫云云今細檢江南通志江寧府志凡山水寺觀古蹟名宦方外各門無一語載及者竟無從考證矣大抵句容縣之大泉寺荒廢已久此碑復淪落草莽修志乘者不及搜採金石以致紀載漏畧如此蓋金石文字

有禪于輿圖考索者爲功不細而修志秉筆者往往土苴棄之則亦無可如何矣碑本庸陋稱劉宋有開明之號書募緣作募緣又大和庚戌至癸丑凡四年作七年又如稱孔門爲邱門謬誤疊見蓋撰者姚暮雖進士而出于鄉貢不離乎鄉者也

苻璘碑

碑高一丈廣四尺五寸三分三十一
行行六十二字正書在富平縣學

唐故輔國大將軍行左神策軍將軍知軍事檢校右散騎常侍兼御史大夫義陽郡王食實封二百戶贈越州都督刑部尚書苻公神道碑銘 并序

銀青光祿大夫守中書侍郎同中書門下平章事充
集賢殿大學士上柱國襄武縣開國侯食邑一千戶

李宗閔撰

翰林學士承旨兼口侍書朝議大夫守尚書工部
侍郎知制誥上柱國河東縣開國男食邑三百戶
賜紫金魚袋柳公權書并篆額

公諱璿字元亮其先琅耶人曾祖諱口媯州刺史大父
諱暉游擊將軍頴王府左口事典軍贈青州刺史烈考
諱令奇昭義軍節度副使試太常卿開府儀同三司琅
耶郡公口口部尚書左僕射公實僕射長子初公與先

公俱爲薊裨將會薊亂同奔於潞潞帥薛嵩署爲軍副
嵩卒其地分移隸于魏魏帥田承嗣知公父子有材畧
各以左右職處之承嗣死子悅代爲帥悅與李納輩隣
封通謀不軌引兵覆口東攻磁邢

天子命并

師馬燧潞帥李抱真督口軍合討之戰於洹水悅軍大
敗王師進逼魏城時公與先公在重圍中悅賊虐日口
衆心離折先公密語口口口口十九年閔事多矣不
能遠引古自安口以還亂臣賊子甚衆于今有噍類遺
種者乎今悅叛亂有狀覆滅無日吾豈能以黃耆之歲
陷赤族之誅口汝部下口口口騎勁卒若捨吾爲質率

屬歸降不唯口口心口足斷賊臂全家徇國吾死無恨可不務乎公泣曰悅忍人也某苟脫去將不利於大人奈方寸何先公曰不口口口師四合吾與汝猶几上肉待俎醢耳且汝不去能全吾乎是父子俱死於逆地汝從吾吾死不朽汝不從吾吾亦死吾死不瞑死一也而逆順禍福相去万里口何疑焉公俯伏不能對時燧知公才畧勇敢使間以禍福諭公與先公之言略同緣是公計遂決乃使家豎潛通其口燧因遺公犀帶以示要約公於是率所部銳師降燧由是殺始弱而王師益壯燧既納公署爲軍副以

聞詔授特進試太子詹事

兼御史中丞封義陽郡王實封百戶旣而悅引責先公
先公讓曰公逆親背主亡在旦夕某教子効順殺身成
仁口之死口愈於公遠矣又何責焉悅大怒躍起先公
從容不撓視死如歸獲所之禍遂延於家屬俄公仰
天搏膺口口口絕泣血忍死竟終先公之志焉燧口就
撫勉復列上其事

德宗皇帝嘉而悼之 詔

公起復加左散騎常侍兼御史大夫賜晉陽第一口口
縣口五十口追贈先公戶部尙書貞元元年李懷光寇
蒲反 詔燧以河東之師討之公爲燧腹心之將將
五千先濟河與西師合勢據要同收長春宮降徐庭光

懷光平加賞封口戶二年西蕃寂邊攻逼鹽夏公口偏
師擊虜解圍而還三年從燧入 觀擢拜輔國大將

軍行左神策軍將軍知軍事復賜靖恭里第一所藍田
田十口口貞元初 德宗之幸梁還也懲神策

軍兵口將輕緩急非有益乃蒐卒謀帥以公充選時謂
得人禁暴戒嚴 上心倚賴口年丁鄧國太夫

人憂起復本職初先公之羅魏禍也太夫人潛匿以免
及悅死 詔迎于魏加號鄧國夫人賜宴於

別殿以示

寵異上又思先公之忠烈再贈

尚書左僕射公之弟琳授檢校太子賓客瑯琊郡公瑤

授忻州別駕瑯琊縣男皆号開府分領禁職賞與公同
忠勞也公居環衛凡十二年
上知其忠勤謹

重方將大用不幸寢疾以貞元十四年七月廿四日終
於靖恭里賜第享年六十有五贈越州都督其年黃鍾
月庚申日葬於京兆富平之薄臺從先僕射之兆也夫
人長樂馮氏封長樂郡夫人先公而歿至是祔焉有子
四人曰濟曰口曰口曰澤澈前爲邠寧節度使後爲河
東節度使太孀尹北都留守檢校兵部尚書御史大夫
瑯琊郡開國侯食邑一千戶襲實封一百戶

今上元年再贈公刑部尚書贈夫人長樂郡太夫人從

子貴也按國典官至三品墓得立碑又按口葬令諸追
贈官品得同正經曰立身揚名以顯父母孝之終也禮
云銘者論議其祖先德善功烈慶賞名聲明著後代所
以崇孝也順也今苻氏作率舊章碑于墓不亦宜乎今
瑯琊侯論議先德銘于碑其可闕乎矧僕射之忠若彼
尙書之順如此舉而書之可以勸天下之爲人臣人父
者瑯琊公之顯揚又如此附而贊之可以勸天下之爲
人子人孫者將欲篤前烈垂後嗣俾永永有光重爲銘
云

國步將衰必有忠傑家聲將作必有孝節烈烈苻氏世

生才哲惟公先公越在叛戎相時度勢禍將及宗幹逆
杖順天誘其畏捐軀以義教子以忠遂秉大節密授於
公惟公桓桓干夫之雄違情稟令號泣旻穹天啟其初
神贊其終克繼先志卒成後功

天子嘉之

寵命有融乃膺任用乃著勳庸出領王師掃蕩關東八
統環衛肅清 禁中再加真食大啟土封弄印珥貂焜
耀厥躬噫 寵非不隆秩非不崇不將不帥人望口

充善口慶流生瑯琊侯念祖顯父厥德聿修授鉞邠郊
移旆并州西壘北門克壯其猷文承詩禮武襲弓裘三
業濟美時無與儔蒸蒸瑯琊揚名報恩告躬 三命

賁靈九原 澤覃電交銘煥璵璠旣肥其家又大其門
貽燕之謀垂裕後昆褒榮之 渥自葉流根禕乎哉神
嶽有基靈河有源古人云非此父不生此子非此祖不
生此孫誠哉是言誠哉是言

中書省口口口官昭武校尉守京兆周城府折衝

柱國邵建和簡字

右唐符璘碑按唐書列傳璘姓符而碑作符以姓氏
書考之琅邪符氏出于魯頃公之孫公雅爲秦符節
令因以爲氏而武都符氏出于有扈之後爲啟所滅
彝西戎代爲氏酋本姓蒲至符堅以背有文改焉今

此碑以璘爲苻氏又云其先瑯邪人皆不可知然按璘與弟瑤皆封邑于琅邪豈書碑者誤以苻爲符其家出於武吏不知是正乎

金石錄

金石錄云題中書侍郎同平章事李宗閔撰宗閔大和七年爲此官 宋王楙野客叢書曰苻堅其先本姓蒲其祖以識文改爲苻符融其先魯頌公孫仕秦爲符璽郎以符爲氏故苻堅之姓從草符融之姓從竹二姓固自不同而唐義陽郡王苻璘碑合從竹而書作苻而苻堅之苻又有書從竹者皆失於不契勘耳余考漢碑隸書率以竹爲卅少有從竹者如符節

字皆然今前漢書符瑞多從竹魏晉以下真書碑亦有書符節為符印者蓋古者皆通用故耳此又不可不知顏元孫干祿字書曰從草者為姓從竹者為印亦未之察也符融之符獨非姓乎

金石文
字記

碑云公諱璘字元亮沂州臨沂人傳云瑯琊人蓋傳舉其郡而碑舉其州與縣也碑云璘在田悅軍中并州帥馬燧以犀帶遺公為約而傳畧之傳云璘與父令奇嚙臂別而碑不載豈作史者欲形其父子之忠義而粉飾之也耶

金石
後錄

璘父令奇見唐書忠義傳碑所述與史多同璘兄弟

三人同降弟琳檢校太子賓客琅琊郡公瑤忻州別
駕琅琊縣男史皆失書其名令竒加贈左僕射璘加
贈刑部尚書史亦失書璘子澈累官邠寧河東節度
使檢校兵部尚書位甚顯而本傳不書何也

潘研堂
金石文

尾跋

今額上並無字蹟應是勒碑時未及之也或謂後人

磨去者非

關中金
石記

碑字亦有殘脫然釋其文皆可句璘初爲田悅將後
以去逆効順屢從征著有功伐案新唐書璘附其父
令竒傳後事多不備攷田悅傳悅以苻璘爲腹心馬

燧傳悅使苻璘李瑤衛還淄青殘兵璘等亦降今碑
所稱燧知公才略開以禍福公計遂決乃使家豎潛
通其誠燧因遺公犀帶以示要約公於是率所部

下
是其事也傳又言李懷光反河中賊將徐廷光守

長春宮城燧諭廷光云云以碑證之璘亦同收長春

宮降徐廷光而本傳惟錄先濟河與西師合而已璘

之歸國由其父決計及璘降而父仍留賊營遂為賊

所害延於家屬其死忠之報宜福流其子也

按堂金石錄

按此碑無建立歲月惟憑撰書人結銜考定之金

石錄云碑題中書侍郎同平章事李宗閔撰金石

文字記云宗閔大和七年爲此官則碑文當爲大和七年撰矣新唐書宗閔傳拜罷無年月舊傳則云大和七年德裕作相六月罷宗閔知政事檢校禮部尙書同平章事興元尹山南西道節度使德裕秉政羣邪不悅文宗乃復召宗閔于興元爲中書侍郎平章事進封襲武侯食邑千戶此金石錄所云大和七年爲此官者是也及考之宰相表大和七年六月乙亥宗閔檢校禮部尙書平章事興元節度使八年十月庚寅李宗閔守中書侍郎同平章事則其再入政府乃八年事碑文宜以八年

撰也又攷之書篆者柳公權結銜云翰林學士承
旨兼侍書朝議大夫守尚書工部侍郎知制誥兩
唐書公權傳皆云穆宗卽位拜右拾遺充翰林侍
書學士累換司封兵部二郎中宏文館學士文宗
復召侍書遷諫議大夫俄改中書舍人充翰林書
詔學士開成三年轉工部侍郎傳惟諫議大夫
碑作朝議不同据
此則碑書于開成三年建立亦當在是年矣苻璘
事蹟兩唐書俱入忠義傳舊書璘有專傳而附其
父令奇于後新書則令奇有專傳而附璘于後兩
傳皆詳于令奇而畧于璘其貞元元年以後璘從

馬燧收長春宮降徐庭光平李懷光解靈夏圍擢
拜輔國神策將軍復賜田宅加贈令奇尚書左僕
射璘弟琳瑤授官封爵皆兩傳所無者兩次賜田
碑皆有泐字以新傳證之初賜祁縣田五十頃與
碑合再賜藍田田四十頃碑于藍田田下有十字
則當是十幾頃非四十頃也碑云公居環衛凡十
二年新傳云十三年据碑璘以貞元三年拜輔國
神策以十四年卒是居環衛正十二年傳誤也自
貞元十四年卒後至開成三年距四十年之久而
後立碑亦云遲矣碑有今上元年再贈公刑部尚

書之語文宗大和紀元之後稱元年者卽開成則
所稱今上仍是文宗然則此碑之立於開成三年
可確信也

元奘塔銘

石高三尺四寸五分廣六尺八寸四分
七十六行行四十二字行書在西安府

大
唐三藏大遍覺法師塔銘 并序

朝議郎檢校尙書屯田郎中使持節洛州諸軍事守
洛州刺史兼侍御史上柱國賜緋魚袋劉訶撰
安國寺內供奉講論沙門建初書

歲丁巳開成紀元之明年有具壽沙門日令檢自上京

抵洛師以縹囊盛三藏遺文傳記訪余柴門于行修里
且曰聞夫子斧藻羣言舊矣詎直專聲於班馬能不爲
釋氏董狐耶抑豈不聞貞觀初慈恩三藏之事乎敢矢
厥來旨云 三藏事跡載國史及慈恩傳今塔在長安
城南三十里初 高宗塔于白鹿原後徙於此 中宗
製影贊謚大遍覺 肅宗賜塔額曰興教因爲興教寺
寺在少陵原之陽年歲寤遠塔無主寺無僧荒涼殘委
游者傷目長慶初有納衣僧曇景始葺之大和二年安
國寺三教談論大德內供奉賜紫義林修三藏忌齋于
寺齋衆方食見塔上有光圓如覆鏡道俗異之林乃

上聞乃與兩街三學人共修身塔兼礮一石於塔至三年修畢林乃化遺言於門人令檢曰尔必求文士銘之檢泣奉遺教直以銘爲請非法襲之家嫡誰何至此乎軻三讓不可乃略而銘之 三藏諱惠奘俗陳姓河南緱氏人曾父欽後魏上黨太守祖康北齊國子博士父惠英長八尺美鬚眉魁岸沉厚號通儒時人方漢郭林宗有子四人奘其季也年十三依兄捭出家於洛屬隋季失御乃從 高祖神堯於晉陽俄又入蜀學攝論毘曇於基遲二法師武德五年受具於成都精究篇口口學成實於趙州深學俱舍於長安岳於是西經前來者

無不貫綜矣初中國學者多以實相性空通貫羣說俾
彖象蹄筭往往失魚兔於得意之路至於星羅碁布五
法三性拚秋毫以矢名相界地生彙各有攸處曾未暇
也大遍覺乃興言曰佛理圓極片言支說未足師決固
是經來未盡吾當求所未聞俾跛眇兒視履必使解行
如函蓋始可爲具人矣且法顯智嚴何人也猶能孤遊
天竺而我安能坐致耶初三藏之生母氏夢法師白衣
西去母曰何去曰求法貞觀三年忽夢海中蘇迷廬山
遽凌波而入乃見石蓮波外承足山險不可上試躡身
騰蹕颯然颺舉升中四望廓澈無際覺而自占曰我西

行決矣至京州都督李大亮防禁持切逼法師還京法師乃宵道渡瓠蘆河出玉門經莫賀延磧艱難險阻仆而復起者何止百十耶自尔涉流沙次伊吾高昌王總支泰遣貴臣以駝馬逐法師於白力城王與太妃及統師大臣等尊以師禮王親跪於座側俾法師踣履而上資贈甚厚送至菜護可汗衛又以廿四封書通屈支等廿四國獻花繪五百疋於可汗稱法師是以第欲求大法於婆羅門國願可汗憐師如憐奴其所歷諸國爲其王禮重多此類也自爾支提梵刹神奇靈跡往往而有法師皆滌誠盡敬耳目所得孕成多聞與夫世稱博物

者何相萬耶詳載如傳唯至中印度那爛陀寺等遣下
座廿人明詳儀注者引叅正法藏卽或賢法師也旣入
謁肘膝著地鳴足已然後起法藏訊所從來曰自支那
欲依師學瑜伽論法藏問則涕泗曰解我三年前夢金
人之說佇尔久矣遂館於幼日王院覺賢房第四重閣
日供擔步羅菓一百廿枚大人米等稱是其尊敬如此
法師旣名流五印三學之士仰之如天故大乘師號法
師爲摩訶天小乘師號解脫天乃白大法藏請留之法
師曰師等豈不欲支那之人開佛惠眼耶不數日東印
度王拘摩迎法師戒日王聞法師在拘摩處遣使謂拘

摩曰急送支那僧來拘摩曰我頭可得僧不可得戒日
神武雄勇名震諸國乃怒曰爾言頭可得可將頭來拘
摩懼乃嚴爲軍二萬疋三萬與法師同泝苑伽河築行
宮于河北拘摩自迎戒日于河南戒日曰支那何不來
拘摩曰大王可屈就王旣見法師接足盡敬且曰弟子
聞支那國有秦王破陣樂乃問秦王是何人法師盛談
太宗應天順人事王曰不如此何以爲支那主因令
法師出制惡見論然小乘外道未卽推伏請於曲女城
集五印沙門婆羅門等兼十八國王觀支那法師之論
凡十八日無敢當其鋒者戒日知法師無留意厚以爲

馬橐裝餞法師又以素疊印書使達官送法師所經諸國令兵衛達漢境法師却次于闐因高昌高胡入朝附表奏自西域還 太宗特降天使迎勞仍制于闐等道送法師令燉煌迎於流沙鄯鄯迎於沮洳時 帝在洛陽 勅西京留守梁國公元齡脩有司迎待是日宿于漕上十九年春三月景子留守自漕奉迎於都亭有司頒諸寺帳輿花幡送經於宏福翌日大會於朱雀街之南陳列法師於西域所得經像舍利等其梵文凡五百廿夾六百五十七部以廿馬負而至自朱雀至宏福十餘里傾都士女夾道鱗次若人非人曾不知幾俱胙矣

壬辰法師謁 文武聖皇帝於洛陽宮二月己亥對於
儀鸞殿因廣問雪嶺已西諸國風俗法師皆備陳所歷
若指諸掌 太宗大悅謂趙公無忌曰昔苻堅稱口安
爲神器今法師出之更遠時 帝將征遼法師請於嵩
之少林翻譯 太宗曰師西去後朕爲 穆太后於西
京造宏福寺寺有禪院可就翻譯三月己巳徙宏福夏
五月丁卯法師方開貝葉廿年秋七月法師進新譯經
論仍請製經序并進奉 勅撰西域記十二卷 太宗
美法師風儀又有公輔才俾法師勸緇禍冀金紫法師
因以五義褒揚聖德乞不奪其志遂問瑜伽十七地義

太宗謂侍臣曰朕觀佛經猶瞻天望海法師能於異域得是深法非唯法師順力亦朕與公等宿殖所會及三藏聖教序成 神筆自寫 太宗居慶福殿百寮陪位坐法師命宏文館學士上官儀對羣寮讀之廿二年夏六月 天皇大帝居春宮又製述聖記及菩薩藏經後序 太宗因問功德何取法師對以度人自隋季天下祠宇殘毀繼伍殆絕 太宗自此 勅天下諸州寺宜各度五人宏福寺度五十人戊申 皇太子宣令請法師爲慈恩上座仍造翻經院備儀禮自宏福迎法師太宗與皇太子後宮等於安福門執香爐目而送之

至寺門 勅趙公英中書令褚引入於殿內奏九部樂
破陣舞及百戲於庭而還廿三年夏四月法師隨 駕
於翠微宮談賞終日 太宗前席攘袂曰恨相逢已晚
翌日 太宗崩於含風殿 高宗卽位法師還慈恩專
務翻譯永徽三年春三月法師於寺端門之陽造石浮
圖 高宗恐功大難成令改用甄塔有七級凡一百八
十尺層層中心皆有舍利冬十月 中宮方妊請法師
加祐旣誕神光滿院則 中宗孝和皇帝也請號爲佛
光王受三歸服袈裟度七人請法師爲王剃髮及滿月
法師進金字般若心經及道具等顯慶二年春二月

駕幸洛陽法師與佛光王發於 駕前既到館於積翠
宮終譯發智婆沙法師早喪所天因 扈從還訪故里
得張氏姊問塋壠已平矣乃捧遺柩改葬於西原 高
宗勅所司公給備喪禮盡飾終之道洛下道俗赴者萬
餘人釋氏榮之三年正月 駕還西京 勅法師徙居
西明寺 高宗以法師 先朝所重禮敬彌厚中使旁
午朝臣慰問及錫賚無虛日法師隨得隨散中國重於
般若前代雖翻譯猶未備衆請翻焉法師以功大恐難
就乃請于玉華宮翻譯四年十月法師如玉華館於肅
成院五年春正月一日始翻梵本忽甘萬偈法師汲汲

然常恐不得卒業每厲譯徒必當人百其心至龍朔三年方絕筆法師翻般若後精力剋耗謂門人曰吾所事畢矣吾瞑目後可以蓮蔭爲親身物門人兩泣且曰和上何遽發此言法師曰吾知之矣麟德元年春正月八日門人靈覺夢一大浮圖倒法師曰此吾滅度之兆遂命嘉尚法師具錄所翻經論合七十四部忽一千三百卅八卷又造俱脰書像彌勒像各一千顆又造素像十俱脰供養悲敬二油各萬人燒百千燈贖數萬生乃與寺衆辭三稱慈母願生內眷至二月五日夜弟子光口問云和尚決定得生彌勒內衆否頷云得生俄而去春

秋六十九矣初 高宗聞法師疾作 御殿相望於道

及坊州奏至 帝哀勳爲之罷 朝三日 勅坊州刺

史寶師倫令官給葬事又 勅宜聽京城僧尼送至塔

所門人奉柩於慈恩翻經堂道俗奔赴者日盈千萬以

四月十四日葬於達東京畿五百里內送者百餘萬人

至總章二年四月八日有 勅徙於樊川北原傷 聖

情也法師長七尺眉目若畫直視不顧端嚴若神自大

教東流翻譯之盛未有如法師者雖滕蘭澄什康會竺

護之流無等級以寄言其彬彬郁郁已布唐梵新經矣

自示疾至於昇神奇應不可殫紀蓋莫詳位次非上地

其孰能如此乎文曰

三藏之生本乘願來入自聖胎出於鳳堆大業之季龍
潛於并孺子謁 帝與兄偕行 神堯奇之善果度之
不爲人臣必爲人師師法未足自洛徂蜀學無常師烏
必擗木跡窮夷夏更討身毒寺入爛陀師遇尸羅王逢
戒日論得瑜伽瑜伽師地藏教泉府蝟蝶名數爾抽聖
緒我握其樞赤幡仍豎名高曲女歸我 真主主當

文皇臣當蔡梁天下真觀佛氏以光光光三藏是護是
付付得其人經論彬彬梵語華言胡漢相宣合臣筆受
御膝前席積翠飛花恩光奕奕 太宗序教 天皇述

聖揚於天庭百辟流詠三載慰喜靈祇介祉篋彼滕什
口無此事我功成矣我名遂矣脫疑玉華昇神暗史發
棺開殮天香馥馥地位孰分神人是卜中南地高樊川
氣清修塔者誰林公是營門人令檢實尸其事銘勒塔
旁檢真法子

開成四年五月十六日馮翊沙門令檢修建

廣平宋宏度刻字

元奘久居西域廣釋佛言唐太宗極尊崇之據史卒
於顯慶六年卽龍朔元年銘則云卒於麟德元年之
二月史云年五十六銘云年六十九先葬遼東後移

徙樊川北原卽少陵原文宗開成四年劉軻纂文僧
建初書行草秀勁有法而文亦粗能言師事俱可存
也

石壘
鑄基

元奘法師始出塞涼州都督李大亮留之不聽去且
奏聞邊臣之風紀凜然高祖勅放行崎嶇西域十七
載得番經六百五十七部而還詔譯於慈恩寺再譯
於洛中自佛法入中國至是始大行於世也按唐書
法師從天竺東歸婆羅門國王尸羅逸多遣使隨入
朝貞觀二十年命長史王元策往慰之蔣師仁爲副
未至尸羅逸多死其臣阿羅那順自立發兵拒元策

元策時從騎纒數十戰不勝皆沒時吐番以向主親
中國元策挺身奔吐番西郵檄召隣國兵吐番泥阿
婆羅皆將騎士以來二十一年五月元策部分之攻
和羅城三日破之婆羅那順委國走合散兵復陣師
仁破擒之獲其妃王子萬二千人雜畜三萬降城五
百八十獻俘告廟法師且親見之矣天竺居葱嶺南
去長安萬里自古未有使至其國者法師以取經爲
其王敬信其臣阿羅那順悖逆遂以召戎至於君臣
係累萬里爲俘中國之威靈於佛法何有哉今阿羅
那順刻石肖像於唐太宗昭陵列諸番君長十四石

人之未侍立北闕背刻曰婆羅門帝那伏帝國王阿

羅那順云

來齋金石
刻考畧

塔銘稱曾祖爲曾父潘昂霄金石例所未聞也碑載
永徽三年春三月造軌塔七級事其下部云冬十月
中宮方姪請法師加祐俄誕神光滿院則中宗孝和
皇帝也請號爲佛光王受三歸服袈裟度七人請法
師爲王剃髮按中宗以顯慶元年十一月生若永徽
三年則其時武氏未爲后不得云中宮矣碑蓋失書
其生之年爾

潛研堂金
石文跋尾

舊唐書本傳云師洛州偃師人此云緱氏人未知孰

是所稱東印度王拘摩者卽尸鳩摩也戒日王者卽
中印度尸羅逸多也坊州刺史竇師倫倫史作綸

金石記

基公塔銘

石高二尺二寸五分橫廣三尺四寸五分
共四十一行行二十三字行書在咸寧縣

大慈恩寺大法師基公塔銘 并序

朝散大夫檢校太子左庶子使持節金州諸軍事守
金州刺史兼御史中丞輕車都尉賜紫金魚袋李宏
慶撰

安國寺內供奉講論大德建初書

按吏部李侍郎又碣文法師以 皇唐永淳元年仲冬
壬寅日卒於慈恩寺翻譯院有生五十一歲也後十日
陪葬於樊川元奘法師塔亦起塔焉塔有院大和二年
二月五日異時門人安國寺三教大德賜紫法師義林
見先師舊塔摧圯遂唱其首率東西街僧之右者奏發
舊塔起新塔功未半而疾作會其徒千人盡出常所服
玩泊向來箕斂金帛命高足僧令檢俾卒其事明年七
月十三日令檢奉行師言啟其故塔得全軀依西國法
焚而瘞之其上起塔焉又明年十月賁行狀請宏慶撰
其銘予熟聞師之本末不能牢護師姓尉遲諱基字靈

道其先朔州人累世以功名致爵祿先考宗松州都督伯父鄂國公 國初有大勲力禦道身長六尺五寸性敏悟能屬文尤善於句讀凡經史皆一覽無遺三藏法師靈奘者多聞第一見靈道頗加竦敬曰若得斯人傳授釋教則流行不竭矣因請於鄂公鄂公感其言奏報天子許之時年一十七既脫儒服披緇衣伏膺奘公未幾而冰寒於水矣以師先有儒學詞藻 詔講譯佛經論卅餘部草疏義一百本大行於時謂之慈恩疏其餘崇飾佛像日持經戒瑞光感應者不可勝數嗟乎靈道其家世在朔漠宜以茹毛飲血鬪爭煞戮背義妄信

爲事今慕浮屠教苦節希聖采入其奧与夫鄂公佐聖
立國公成身退出于其類爲一代賢人實稟閒氣習俗
不能染也明矣退爲銘曰

佳城之南兮面南山 靈奘法師兮葬其閒 基公旣
歿兮陪其後甲子一百兮四十九碣文移入于本寺中
曇景取信于田舍翁義林高是 曰令檢親承師言于
精誠感試具畚鍤于發屨堂全身不朽兮滿異香銘誌
分明于是靈道齒白骨鮮于無銷耗瑞雲甘雨兮畫像
濛神祇悉窅兮羅壽宮依教 毗兮得舍利金瓶盛之
于埋厚地建塔其上兮高巍巍銘勒貞石兮無媿辭深

谷爲岸于田爲瀛此道寂然于感則靈

左街僧錄勝業寺沙門體虛 前安國上座沙門智
峯 右街僧錄法海寺賜紫雲端

安國寺上座內供奉內外臨壇大德方璘
寺主內供奉灌頂 都維那內供奉懷津 院主曇
景

同勾當僧懷真 德循 惠臯 惠章

興教寺上座惠溫 寺主超顛 都維那全契

僧道榮 僧道恩 僧瓊播 義方 巡官宋元義

開成四年五月十六日講論沙門令檢修建

基公者尉遲敬德之從子也。度爲僧，譯經于慈恩寺。卒于永淳中大和間。始建塔，李宏慶銘之。書者亦建

初石墨

鑄華

奎基法師尉遲敬德之子，年十八有絕力。每出以三車自隨：一載醇酒精饌，一載女樂十餘人，一載兵器。而自與壯士錦袍花帽，以騎從。遇所欲留處，縱飲至醉，擁女樂遍幸之。而後與壯士運矛挺槊，持刺自快。率以爲常。元奘法師自西域取經回，欲立賢首宗，旨而難其堪授者。一日請于唐文皇曰：「大唐國中能承我法嗣者，尉遲子耳。」帝命敬德令依奘剃落髮爲鬘。

示數語卽盡棄其習而精研宗乘今相宗諸秘奧皆其所披析也然性庸落不知有戒律饑則恣食飽則納履而已一日行脚買牛肉啖之而挂其餘于錫端至一刹乃宣律師所住也留三宿別去宣律平日受天供不御人間食至是天供三日不至奎師行復來宣師曰日來爲粗行者腥穢所觸耶天人曰不然我輩岳瀆小聖耳兩日聞本刹有大乘菩薩四洲大力神王色欲界主咸在擁護故不敢唐突今幸其行始得展敬也宣律爲之三歎久之曰我不能也而奉律

益嚴

此段話記海上老僧號休如者與予夜談于龍井不知所據出藏何函何典爾時但覺雄邁歷

落之氣可以壯人膽骨故特
追而著之 紫桃軒雜綴

基公尉遲氏蓋鄂公從子元裝請之而後披剔者鄂
公晚節學延年效方士之所為宜其陷是子于緇流
也碑首按吏部李侍郎又碣文又唐書有傳為吏部
時請謁不行時人語曰李下無蹊徑風斯尚矣銘題
基缺畫下字凡兩見又不缺或以行書可權為之耶

投堂金
石跋

道士邢口等題名

石橫廣一尺六寸七分高一尺八分七分
行約五字隸書在錢塘縣吳山青衣洞

大唐開成五年六月十八日□□□□岳道士邢口□

錢唐縣令錢華記道士諸葛鑿元書

按杭州府志職官卷錢塘令錢華開成元年任據此題名則開成五年尙爲令也題名泐字周密癸辛雜志云闕古泉嶺旁有開成元年南嶽道士邢令問錢塘縣令錢華題名道士諸葛鑿元鑄之石上据石刻則錢華是記諸葛鑿元書之且是五年非元年癸辛雜志有小訛也而邢令聞之名則可補石刻之泐題名所在癸辛雜志云在闕古泉嶺旁武林石刻記云在青衣洞蓋吳山青衣洞有石泐石嶺中有泉卽青衣泉也宋韓侂胄於此建閣

古堂因更名闕古泉語見四朝聞見錄諸葛鑑元
善八分書見書史會要

李光顏碑

碑高九尺九寸五分廣四尺九寸五分
二十九行行六十字正書在榆次縣

唐故河東節度觀察處置等使開府儀同三司守司徒
兼侍中太原尹北都留守贈太尉李公神道碑 并序

河東節度觀察處置等使金紫光祿大夫檢校吏部
尚書同中書門下平章事兼太原尹北都留守上柱
國彭原郡開國公食邑一千戶李程撰

夏綏銀宥等州觀察口官登仕郎監察御史裏行雲

騎射郭虔書

□□大厦者實先榱棟利涉巨川者必具舟楫在

憲宗時淮夷阻

命歷選將師大興師戎始以

忠武軍節度使李公首膺注

意之選終成殲寇

之効策勲行賞公實居多故幅員千里盡成內地男女
萬戶不爲匪人任土之貢歲入 王府誰其致之

知所自矣公諱光顏字光遠其先出軒轅因部爲姓号
阿口氏陰山貴種奕代勲華公生於將門早奉成訓忠
孝兩大文武全才學劍旣成就書不倦爰自裨將則有
盛名早與其兄靈武節度使光進其初同在戎府司徒

馬公鎮理河東置之戲下嘗所器異然而志之因間謂
公曰尔有口口終當光大但吾不得見其時耳授以所
執劔杖亦呂虔佩刀之義也其後手孥偏師以合羣師
討楊惠琳於夏臺破劉闢於西蜀由是雄名赫赫冠曜
諸軍矣夫章述盛烈褒表元臣略其細而舉其大蓋春
秋之旨也挹洪流者豈觀濫觴仰層臺者不言累土如
至奉 國盡忠在家惟孝信著朋友愛均弟兄慈惠
以牧人恩威以撫士官修其業吏不敢欺章章焉著於
公論矣其在許昌也則慎固封略繕完兵甲居安不敢
忘戰臨敵而未嘗墮農是以農戰交務偶俱無闕有若

曹公師次學校是修祭遵軍中俎豆不廢得非刃有餘
地才可兼人者乎鄆人不冀命口討叛遂有義成之拜
公以所統者許師所處者東郡疏陳利害遂復其舊焉
連下諸城而齊寇殲歟旋師未幾移鎮邠土塞邊隙而
遏戎隧也會

穆宗踐祚寵綬勲賢以本官同中
書門下平章事復遷歧下寄重股肱幽鎮挺灾輔車爲
口詢于羣議非公莫能促召不俟駕而至再摠忠武之
師兼魏博行營節度使方將盡敵復

命以報

渥恩屬

聖皇軫好生之念下班師之令公乃還

鎮休馬息人浚郊逐師李齊怙亂

帝用震怒俾

公問罪朝受

命而暮卽戎遂入其封軍聲大振叛

者恐懼悉銳而來未及成列公用奇擊敗旗靡敵亂投
戈弃甲追奔逐北如火燎原衆殺首惡遂納其帥微公
之力則不及此進檢校司徒兼侍中策元勳而勸列鎮
也其後秉圭入 覲請代歸 朝伏奏青蒲瀝誠

至懇

上以許人佇望勉諭再三俾口旋止衆庶

相賀或拊或歌雜然歡呼勢不可遏其得人也如此之
深復歷半紀績用大就司徒爲真依前同平章事獎殊
勞而銘景鍾矣翌歲戀 闕誠切拜章聿來

上以太原公之故里晝錦而往孰不榮之拜河東節度

使北都留守太原尹公發跡并部人皆懷之及公之來
如渴者得飲寒者挾纊陶陶焉熙熙焉自不知其所以
然也吏不桀而口自息軍不刑而令無犯無小無大各
附所安則公之才之量曷可涯也於戲邦國將瘳陰陽
遘災決辰之□□魄俱逝享年六十有五寶曆二年九
月三日薨于位并人罷市 天子撤懸廢

朝三日悼宗臣也冊贈太尉明年二月廿二日葬于太
原縣孝敬原夫人隴西縣太君阿史那氏祔焉禮也嗣
子昌元鄜坊丹延等州節度觀察處置等使檢校戶部
尚書兼御史大夫上柱國次子扶元守左龍武軍口將

軍知軍事兼御史中丞次繼元前行太常寺主簿次誠
元守朔州司馬兼監察御史次建元前河東節度右都
押衙檢校國子祭酒兼殿中侍御史次興元前守衛王
友兼監察御史次榮元守右羽林軍統軍檢校左散騎
常侍兼御史大夫次奉元前行太原府清源縣丞次播
元前河東節度押衙左門口兵馬使兼監察御史次安
元右軍先鋒兵馬使守右驍衛將軍咸以義方各勤職
業或秉旄於戎闔或翊衛於

禁營或連榮於

朝班或接武於扈護皆有令稱不墮家聲以程丞公深
知脩熟休烈豐碑見託口敢讓辭相國晉公文者宗匠

載傳芳

開成五年八月十四日建

汝南翟文劄刻字

序云相國晉公之文書公盛績永誌元堂今之甄述
得以略焉光顏之傳視其兄加詳功烈偉矣碑之所
述其大凡耳雖有裴晉公文不應若是之略但傳云
年六十六而碑則六十五

金石錄補

右李光顏碑李程撰文甚簡略蓋有裴度之誌詳之
則碑文可以從簡古人作文不相蹈襲雖它人之文
亦必回避如此據碑文與本傳光顏未嘗帥橫海軍

而宰相表云長慶四年橫海節度使李光顏守司徒

亦誤

潛研堂金石文跋尾

按此碑撰者李程書者郭虔兩唐書無郭虔傳李程全唐詩有其人小傳稱其在翰苑日過八磚乃

至時號八磚學士此碑李程結銜以舊唐書傳考

之封彭原郡公在敬宗即位之初其官河東節度

檢校吏部尚書同中書門下平章事兼太原尹北

都留守俱寶歷

傅誤作寶應

二年事唐書宰相表在寶

歷二年九月惟吏部表傳作兵部為不同光顏以

寶歷二年九月三日薨

舊唐書敬宗紀作九月戊寅薨是月丁丑朔戊寅是

二明年二月廿二日葬則李程之撰文正在薨後
葬前而碑立於開成五年是葬後十五年也榆次
縣李氏有三碑光顏父良臣兄光進二碑已見前
舊唐書地理志范陽節度使臨制奚契丹統經畧
威武清夷靜塞恒陽北平高陽唐興橫海等九軍
橫海軍在滄州城是橫海乃九軍之一而總隸於
范陽節度使不云別置節度也方鎮表則云貞元
三年置橫海軍節度使領滄景二州治滄州光顏
傳載長慶二年討王庭湊命兼深州行營諸軍節
度使又以滄景德棣等州俾之兼管是滄州在兼

管之內其本職是深州行營也或當時深州行營
駐兵滄州兼領橫海是以宰相表有光顏橫海軍

節度使守司徒之語而志傳及碑文俱畧之耳書

敬宗紀寶歷二年四月戊戌朔橫海軍節
度使李全畧卒此為橫海軍置節度之證

馬恒郝氏二夫人墓誌

石高廣皆一尺六寸十七行
行二十一字行書在永濟縣

唐貝州永濟縣故馬公郝氏二夫人墓誌銘 并序

公諱恒父諱超其先扶風郡人也昔馬融注解累代欽
崇風後輿因官徙居甘陵郡乃祖乃父遂為永濟縣人
焉公以禮為度以德為車衣著篇章飲食經藉謝家鮑

氏羞當章句之流恥也文學之列金石爲節松竹表貞
亂代逃名庸君隱跡懷寶不仕韞道迷邦於是通德互
門仁者爲里嗚呼天不憖神莫見祐元和七年七月廿
一日寢疾終於沙丘方私弟也享年卅十時也日月無
光雲天慘色間巷遇密行路傷嗟摧頽縣西一里先夫
人松蘿靡託葛藟無依結誓指於柏舟空淚流於斑竹
以開成六年正月十三日与二夫人遷葬於故塋祀也
仲子口口盡口以竭家資因爲遷柩恐妻改易刻口爲
紀

平生志貞松筠表節堅勁金石潔白冰雪口遍乾坤光

連子孫輝赫三代榮慶一門道善口字名彰四海天何
奄禍於幽魂骨肉永閉於長夜何時再覩明昏

按墓銘舉例謂婦人從夫合葬不書某氏徐氏讀禮
通攷辨之謂金石文字記有垂拱四年澤王府主簿
梁府君并夫人唐氏墓誌銘大中十二年榮陽鄭府
君夫人博陵崔氏合祔墓誌銘今得此碑更足以證
梨洲之說未確而篆額止墓誌銘三字下別刊祔志
二小字尤爲例之創者攷恒名不見于唐世載籍而
誌中述其死後輒以日月無光雲天慘色間巷過密
行路傷嗟及道口口字名彰四海等語加之頗失載

筆之實又如亂代逃名庸君隱跡懷寶不仕韞道述
 邦云云語多詈時更乖文體此必當時不學無術者
 所為故字盡草率且多脫誤之字如恥也文學之列
 句誤也字三行累代欽崇風句七行天不慙句十三
 行恐_疑凌_陵改易句末行銘詞云何時再觀明昏六
 字不與上叶並有脫字上石時蓋已如此故漢人立
 碑貴有察書之人也錢何跋

重修大像寺記

碑高六尺六寸七分廣三尺六寸
 三十一行行六十字行書在隴州

重修大像寺記

□□沙門義叶書

大和乙卯歲 潁川郡陳公爲左神策將軍以其誅

暴息亂 宸衷親付之右地 公上酬天造忠奉

國恩內戢三軍外安百姓擁二州之地霧卷波澄寧

萬乘之心雲銷煙滅冀恢靈乎至道寔匡贊

我有唐至開成戊午歲 公因觀地無遺利農則有

秋遂 謁靈元以告清慎拜大像以請鴻福方歎鳩鴿

巢頂荆棘掩砌廊宇霖漏樓殿欹傾寺無居僧爰詰耆

舊曰頃者庄田典賣於鄉里林木摧毀於樵童賴 □

□□□□□□□□舊地出清俸以收贖因茲請僧重

復其業然耕耘菑穫未有倫次焉 尚書乃命僧藏父
爲赴知己者時不歷二祀裝慈尊以金口飾口殿以丹
釀而衆事云畢至於儲蓄車乘與生生之具兼頃畝年
代並錄之於寺記碑陰以示隣里鄉黨爲免侵奪不朽
之驗凡百君子敬而口之 管莊大小共菜所

都管地摠伍拾叁頃伍拾陸畝叁角荒熟并柴浪等
捌頃叁拾捌畝半坡側荒 肆拾伍頃壹拾捌畝口
口熟 口口瓦屋壹拾貳間 草舍貳拾間 果園壹
所東市善和坊店舍共六間半並瓦風伯疰荒熟共壹
拾一頃伍拾畝東常烈西澗南歐陽北王歸口口口

第一塊連東莊居一段柒拾叁畝半東溝西道南自
至北寺墻一段連西莊居一頃貳拾叁畝東道西張用
南北自至一段貳畝東南自至西軍田北關一段口畝
東自至西道南軍田北博耳俊 第二塊地一段一十
八畝東張弼西張讓南邊昇北河 地一段九畝西河
南河東張進讓北張進讓 一段貳頃貳

拾肆畝東道西官田南北陌一段一頃東博耳憲莊西
道南阡北陌一段十四畝東薛烏暉西符義南北道三
塊一段四十畝東西符義南阡北陌一段十二畝東南
大女西北道一段十二畝東道西自至南馬寬北張德

成一段八十伍畝東符義西道南阡北陌四塊一段二
頃一十六畝東道西杜華南阡北陌一段九十五畝東
道西韓進玉南阡北陌五塊一段一頃一十四畝東渠
西杜元最南阡北陌一段三十畝東張德成西鍾免南
杜華北道一段四十五畝東道西廣聖寺南阡北陌六
塊一段二十五畝東北阿趙西河南阡一段七十五畝
半東鍾興西阿趙南阡北陌信義村一段二十一畝東
張江西南道北塋七塊一段三十畝東鍾進通西晉三
娘南塋北陌一段十二畝東楊清西比富悅南阡北陌
一段三十畝連莊居東董稱西河南阡北口一段二十

三畝連部落莊居東南河西至德寺地北道王杜村一段三十五畝東嶗西道南荀華北陌一段二畝東北道西官田南陵一段十六畝東王進平西安寧南道北關一段八畝東安寧西南北道一段四十五畝東符義西盧詹南陵北道一段二十畝東北王進平西陵南阡野仁城一段一頃七十畝東自至西古城南□□□□一段八十畝東張德成西自至南符義北古城寺東北荒一段三頃一十二畝東溝西施身坑南安敬忠北陵寺壇北一段荒一頃□□□□□□□□□□□□□□□□□□南熟一段三十二畝東陵西道南張德成北寶

志成槐樹谷北坡一段七十畝東道西邠王南張岸北

堧一段南坡□□□□□□□□□□□□□□□□□□

一段二頃一十二畝東道西澗南王翰北溝永壽鄉莊

一段一頃三十二畝東道西澗南劉英北官田一段一

十八□□□□□□□□□□□□□□□□□□□□□□

□□□□北坵一段六十畝東道西水南自至北寶操

一段四畝東西南道北自至三陽鄉白藍平地一□

□□□□□□□□□□□□□□□□一段二十畝當谷東

西堧南水北自至一段五十畝東道西楊江南領北泉

一段四十畝東北水西南楊珪一段一十畝□□□□□

□□□□□□□□□□楊珪南北水一段二十畝
東北水西楊珪南馬恭一段一十畝東西南楊珪北道
一段聖明谷二十畝東道西楊珪南□□□□□□□
□□□東西楊珪南水北楊江一段一十五畝東北自
至西楊江南泉一段一十七畝東南北道西楊江一段
三十五畝東陵西南北道一段□□□柴浪東西北水
南李海一段三十五畝張家坡里仁鄉界東南北荒西
道一段一十二畝排山西坡東西陵南北荒一段高九
谷并柴浪九十畝東北封日榮西道南馬恭一段五十
畝東陵西嶺道南嶺脚北封日榮一段二十畝東北溝

西嶺上道南馬恭 胡桃谷連莊地東至奢馳谷北嶺
近北至閃電嶺及波羅嶺西至澗近北至神塢嶺南至
奢馳谷口東西道北至張英內至侯漸興及泥谷四至
內管熟地七段餘並荒坡柴浪

使請都檢校修造上都淨住寺內供奉大德沙門藏

□ 都維那義葵 前寺住元誼典座

惟釗 直歲懷章 沙門從龍

會昌元年伍月拾日記 秦鐸刻字

按大像寺今陝西通志隴州寺觀已不載蓋頽廢
久矣碑云乙卯歲是大和九年戊午歲是開成三

年碑載潁川郡陳公爲左神策將軍而不詳其名
碑前刻寺記後刻庄地果園頃畝四至而記乃云
頃畝年代並錄于寺記碑陰者何也所記園地數
惟幾頃幾十幾畝至半而止不似後世有釐毫絲
忽細數也地有荒熟則並載之地之段落曰坵曰
埭地之四至曰南阡北陌坵字見廣韻坵陌也字
書無埭字疑俗書或與枝陵通用也阡陌二字舊
說不同說文云 南北爲阡史記秦本紀開阡陌
汪引風俗通曰南北曰阡東西曰陌河東以東西
爲阡南北爲陌朱子曰陌之爲言百也遂洫從而

涇涂亦從則遂間百畝洫間百夫而涇涂爲陌阡
之爲言千也溝澮衡而阡道亦衡則溝間千畝澮
間千夫而阡道爲阡阡陌之名由此而得字典曰
按陸機答張士然詩迴渠繞曲陌通波扶直阡此
以南北爲阡柳宗元田家詩尊食狗所務驅車向
東阡此以東西爲阡也据此碑則云南阡北陌以
阡陌分屬南北而東西不與焉要之阡陌亦無定
義皆田間涂阡之名而已碑書四至之例近他人
者著他人姓名近本寺地則曰自至亦勝見也內
有云東鍾進通西晉三娘晉姓見廣韻唐叔虞之

後以晉爲氏魏有晉鄙然絕無一人登史傳者此
晉三娘獨得列于碑碣以傳何其幸也寺中僧職
有典座又有直歲始見于此

元秘塔碑

碑高一丈五寸廣五尺一寸二十八
行行五十四字正書在西安府學

唐故左街僧錄內供奉一教談論引 駕大德安國寺

上座賜紫大達法師靈秘塔碑銘 并序

江南西道都團練觀察處置等使朝散大夫兼御史
中丞上柱國賜紫金魚袋裴休撰

正議大夫守右散騎常侍充集賢殿學士兼判院事

上柱國賜紫金魚袋柳公權書并篆額

秘塔者大法師端甫口骨之所歸也於戲爲丈夫者
在家則張仁義禮樂輔 天子以扶世導俗

出家則運慈悲定慧佐

如來以闡教利生捨此口

以爲丈夫也背此無以爲達道也 和尚其出家之雄

乎天水趙氏世爲秦人初母張夫人夢梵僧謂曰當生

貴子卽出囊中舍利使吞之口誕所夢僧白誓入其室

摩其頂曰必當大證法教言訖而滅旣成人高穎深目

大頤方口長六尺五寸其音如鍾夫將欲荷 如來之

菩提口生靈之耳目固必有殊祥奇表歟始十歲依崇

福寺道悟禪師爲沙彌十七正度爲比丘諱安國寺具
威儀於西明寺照律師京持犯於崇□□昇律師傳准
識大義於安國寺素法師通涅槃大旨於福林寺峯法
師復夢梵僧以舍利滿琉璃器使吞之且曰三藏大教
盡貯汝腹矣□□經律論無敵於天下囊括川注蓬源
會委滔滔然莫能濟其畔岸矣夫將欲伐株杌於情田
雨甘露於法種者固必有勇智宏辯歟無何□文殊於
清涼衆聖皆現演大經於太原傾都舉會

德宗皇帝聞其名徵之一見大悅常出入

禁中與儒

道議論賜紫方袍歲時錫施異於他等復

詔侍 皇

太子於東朝 順宗皇帝深仰其風親之若

昆弟相與卧起 恩禮特隆 憲宗皇帝數

幸其寺待之若賓友常承 顧問注納偏厚而 和尚

符彩超邁詞理響捷迎合 上旨皆契真乘雖造

次應對未嘗不以闡揚為務繇是 天子益

知 佛為大聖人其教有大不思議事當是時 朝廷

方削平區夏縛吳幹蜀瀦蔡蕩郿而 天子

端拱無事 詔和口口緇屬迎 真骨於靈山開法場

於 秘殿為人請福 親奉香燈既而刑不殘兵

不曠赤子無愁聲蒼海無驚浪蓋叅用真宗以吐口口

政之明効也夫將欲顯大不思議之道輔大有爲之君
固必有真符靈契歟掌 內殿法儀錄左衛僧事以標
表淨衆者凡一十年講沮口口識經論處當仁傳授宗
主以開誘道俗者凡一百六十座運三密於瑜伽契無
生於悉地日持諸部十餘万遍指淨土爲息肩之地嚴
金口口報法之恩前後供施數十百万悉以崇飾殿宇
窮極雕繪而方丈佳床靜慮自得貴臣盛族皆所依慕
豪俠工賈莫不瞻嚮薦金寶以致誠口端嚴而礼足曰
有千數不可殫書而 和尚卽衆生以觀 佛離四相
以修善心下如地坦無丘陵王公輿臺皆以誠接議者

以爲成就常口輕行者唯和尚而已夫將欲駕橫海之大航拯迷途於彼岸者固必有奇功妙道歟以開成元年六月一日西向右脅而戒當暑而尊容口生竟夕而異香猶鬱其年七月六日遷於長樂之南原遺命茶毗得舍利三百餘粒方熾而神光月皎旣燼而靈骨珠圓賜諡曰大達塔曰靈祕俗壽六十七僧臘卅八門弟子比丘比丘尼約千餘輩或講論經言或紀綱大寺脩禪秉律分作人師五十其徒皆爲達者於戲和尚口出家之雄乎不然何至德殊祥如此其盛也承讓弟子義均自政正言等克荷先業虔守遺風大懼微猷有時

堙沒而今 閤門使劉公法口取深道契弥固亦以爲
請頌播清塵休嘗遊其藩備其事隨喜讚歎蓋無愧辭
銘曰

賢劫千佛第四能仁哀我生靈出經破塵教網高張孰
辯孰分 有大法師如從親聞經律論藏戒定慧學深
淺同源先後相覺異宗偏義孰正孰駁 有大法師爲
作霜雹趣真則滯涉俗則流象狂猿輕鈎檻莫收梏制
刀斷尙生瘡疣 有大法師絕念而遊 巨唐啟

運 大雄垂教千載冥符三乘迭耀 寵重恩

頌顯闡讚導 有大法師逢時感召空門正闡法字方

開崢嶸棟梁一旦而摧水月鏡像無心去來徒令後學
瞻仰徘徊

會昌元年十二月廿八日建

刻玉冊官邵建和并弟建初鑄

元祕塔銘裴觀察休撰又十二年休始以鹽鐵使入
相所著楞嚴義解諸所叅會妙人元宗出彼法中居
士長者之流邪

舟州山人藁

元秘塔故是誠懸極矜練之作此本與余所藏正同
皆是有明內庫宋本除斷蝕外鋒鏘纖毫不失今石
在關中雖猶如故然亦已甚頽矣碑文裴休所作休

於禪理最深此獨侈陳大達恩遇文亦方幅妙義味

而唐文粹收之殊不可曉

虛舟題跋

大達憲宗時奉詔與迎佛骨之僧正言是其弟子關

金石記

右大達法師元祿塔碑裴休撰其署銜稱山南西道

都團練觀察處置等使攷唐書方鎮表建中元年升

山南西道觀察使為節度使嗣後無降為團練使事

蓋史文有脫漏爾休傳不載觀察山南西道一節亦

略也

潛研堂金石文跋尾

按此碑世多搨本下截每行磨滅二字雖舊搨者

多同其餘則皆完好也碑題左街僧錄新唐書百
官志貞元四年置左右街大功德使總僧尼之籍
法師蓋充此職也撰者裴休舊唐書傳稱其善爲
文長于書翰自成筆法家世奉佛休尤深于釋典
太原鳳翔近名山多僧寺視事之隙遊踐山林與
義學僧講求佛理云云新書其歷官則舊傳但云
會昌中自尚書郎歷典數郡新傳但云歷諸府辟
署入爲監察御史更內外任此碑結銜云江南西
道都團練觀察處置等使朝散大夫兼御史中丞
皆兩傳所畧也潛研跋云方鎮表建中元年升山

南西道觀察使爲節度使嗣後無降爲團練使事
疑史有脫漏蓋以休結銜爲山南西道也此碑搨
本南字上一字大半已泐然左旁下存點右旁下
存短畫諦視之確是江字之下半非山字末米蒂
書史云江南廬山多裴休題寺塔諸額皆真率可
愛是可爲江南西道之確据矣書篆者柳公權結
銜云充集賢殿學士兼判院事新書傳作知院事
百官志集賢殿書院開元十三年置初制宰相知
院事常侍郎知院事又置判院一人元和四年始
以學士年高者判院事是知院與判院品秩不同

立碑之時公權年已逾七十宜乎判院而傳作知
院疑傳訛也傳又稱公權嘗書京兆西明寺金剛
經有鍾王歐虞褚陸諸家法當時大臣家碑誌非
其書人以子孫爲不孝然則大達之門弟子亦以
得公權書爲孝耶碑但稱大達天水趙氏世爲秦
人而不詳其諱閣門使劉公亦不著其名皆文之
畧也書大頤方口頤作頤別體字

薛行周題名

摩崖橫廣六尺七寸高一尺四寸二
十行行三字左行篆書在所真巖

河東薛於周 呂京赤徐輿 誰本未

維出強矣磨之狀治四寺多貢月十四日
同煇重初嚴物致品高辨本高講並八
同三輝慕禮謁僧於爾西參書

釋文

河東薛行周 邑亢夫徐奧 進士朱忱進士張虔魯
有敷會昌二年二月十六日同遊玉不巖忱 磊落辯
士魯攜孟八麗君四輝 禮謁僧道真真魯書
處士包公夫人墓誌

石高一尺三寸五分廣一尺四寸十
五行行十八字正書在仁和趙氏

唐處士包公夫人墓誌銘 井序

夫人姓張其清河人也 皇父諱隣夫人生有妍姿長
終言行包君前娶義陽朱夫人而生四子不幸朱夫人
中年下世及終喪親迎口夫人爲繼室敬愛均乎長幼
周旋廣備親疎撫育前男恩通己子嗚呼夫人行年六
十有六以會昌三年十月九日奄終錢唐縣方輿鄉之
私第包君以再傷齊體追悼何心盡禮居喪卜時將葬
前男女哀慕無容以其年癸亥十二月十二日丙申葬
于履泰鄉之高原禮也恐陵谷以變更託斯文之口詔
曰

噫夫人兮 倏口流年 口口口兮 寂寞荒原 慘

慘霜口 悠悠夜泉 未口口口 口於此焉

右處土包公夫人墓誌海寧陳仲魚所贈云頃歲杭人培土得之文字尚可辨攷咸淳臨安志錢唐縣十三鄉有履泰南鄉履泰北鄉而味見方輿之名蓋宋時諸縣鄉里之名多有更易不皆沿唐之舊也包君名字不見於誌今杭城南有包家山潛氏臨安志已載之是包亦杭之舊族矣其書銘作詔則它碑所未

有潛研堂金
石文跋尾

按此誌爲趙君晉齋所搨贈晉齋自言得于錢塘西溪山中据誌稱葬于履泰鄉咸淳臨安志錢塘

鄉名履泰分南北二鄉南鄉管里三曰放馬膝脂
黃妃北鄉管里六曰黃山石塘埭帶西堰師姑青
枝又欽賢鄉管里六曰涇山西溪韓家蓀弄東木
上步若此誌石得從西溪則葬處當在欽賢鄉矣
細檢杭州府志所載武林西溪諸山所在核其鄉
名大抵欽賢與履泰中間只隔靈隱一山山南爲
履泰山北爲欽賢履泰鄉以有履泰將軍廟得名
廟在靈隱山之南似乎此誌得之于西堰青芝一
路而晉齋以爲西溪者約畧之詞也太平寰宇記
稱錢塘鄉里舊有二十五鄉今一十一鄉此是錢

氏初納上以後之語所謂舊有者必是唐時鄉里誌中所謂方輿鄉當卽在舊有二十五鄉數內至宋初已失傳矣銘曰作詔曰詔字見廣韻彌正切訓爲詔目增韻云辨別物名皆與銘墓義別詔字之見于史文者字典引新唐書于志寧傳有之云昔陶宏景以神農經合雜家別錄註詔之舊唐書傳無此語今檢汲古閣本新唐書于傳詔直作銘字與字典所引不合蓋字典所据係善本唐書毛刻各史頗有妄改之病此其一斑也此誌以詔爲銘或詔本與名通猶解進墓誌刻頌立名以名爲銘之例

耳誌又云恩通已子通當作過哀墓無容墓當作
墓又其清河人也其字下當有先字皆脫誤也誌
有包君之稱文非處士所自作而不著撰書人姓
名且文中亦不敘包君名字事實皆疎也

王文幹墓誌

石高廣俱二尺五寸三十八行行三十
字至三十二字不等正書在西安府

大唐故中大夫行內侍省內給事員外置同正員上柱
國賜緋魚袋王公墓誌銘 并序

通直郎試大理評事趙造撰

鄉貢進士蕭睦書

公諱文幹字強之其先卽秦將翦公之洪崖也自時厥後子孫衆多文能出羣武蘊異略資則善虜其將義乃下筆成龍功業居高名施於後秦霸天下斯皆王氏之力也遂使高秋朗月瀚海澄波諸族難儔家世雄盛

皇朝中散大夫內侍省內侍賜紫金魚袋奉 詔和蕃

使兼安西北庭使諱奉忠公之曾王父也德重名高情見義立西戎斂跡不敢東闕北狄戢羣不敢南牧內侍省內侍賜紫金魚袋內弓箭庫使奉天定難 南朝元

從功臣諱英進公之祖王父也義勇冠時見危致命親

承 聖旨獨步 中朝右神策軍散副將雲麾將軍

試殿中監奉天定難隨 駕南朝元從功臣諱臣端公

之烈考也功高位下命不待時慶流有徵果有令子榮

高處厚德抱雄圖公卽雲麾將軍第三子也 憲宗踐

阼時公年始童舞人趨 紫闥出踐 丹墀敷奏詳明

儻爲俊彥遂拜供奉官恪居官次務謹去奢臨事無渝

爲官不昧斯乃冲天逸翰出澗喬松錫以朱紱之榮帶

以銀璋之命改梨園判官奉八音之禮專五菓之名藝

就日新功勤益著遷鷄坊使翦拂珎禽在闈自我羽翼

奇特利用絕羣每蘊能名誰之與正轉宣和殿使載離

寒暑日往月來每候 攀輿矍刻無失金石磨而不磷

璧玉琢而弥堅改軍器監判官專任武庫奠體有程榦
倚必時實謂戎備籌遷左神策軍宴設使庖厨有節饗
殮無遺脩饌必善於精華宴飲實慙其醉飽鎮幕歌晚
坊局施留拜同官鎮監軍地居畿甸鎮歷要衝路接塞
垣命之監理虬龍豈與蚯蚓爲伍鸞鳳難可枳棘長栖
時當用才俛之密侍依前充供奉官使於四方善能專
對利於一事因不克堪未幾息車改裁接使公墾園樹
菓殖地生苗供億猶勤庶事無闕有司惜才戀德公乃
布義行仁開成五年 詔遣充新羅使拜辭 龍
闕指日首途巨海洪波浩浩萬里一葦濟涉不越五旬

如烏斯飛屈于東國王事斯畢迴橈累程潮退反風征
帆阻駐未達本 國恐懼在舟夜耿耿而罔爲魂營

營而至曙嗚呼險阻艱難備嘗之矣及其不測妖恠覓
生波滉漭而滔天雲靄變而蔽日介副相失舟楫差池
毒惡相仍疾從此起扶侍歸 國寢膳稍微藥石無

功奄至俎謝享年五十有三會昌四年歲在甲子夏四
月蓂生五莖日終于京地萬年廣化里私第雖違三月
之期終遂九原之禮是歲冬十月十五日葬于鳳城東
龍首原禮也嗟乎命之不偶李廣豈送於封侯梟在官
門士衡終聞於歎鵬公婚于榮陽鄭氏克諧琴瑟相敬

如賓有子三人男曰義仙義立女適齊郡史氏孤子銜
恤茹荼哀號罔極恐田成碧海谷變爲陵片石未鑿防
墓何辯用憑不朽之石以誌永存之詞銘曰

猗嗟大夫短折不祿歷事五朝白珪三覆賈誼促齡士
衡歎鵬許國一心居家可理善則稱君過則稱己君臣
道合如魚如水嫉惡如讎見善必遷愛如冬日畏若夏
天臨官廉平無黨無偏奉命出使汎海東夷洪流混濊
陽鳥攸危大波汨起天地變移王事斯畢車騎倅迴臨
達本國魍魎爲灾幽魂何往遊岱不來聯綿經歲四體
轉衰倅恩處順闔門銜悲吾將安仰哲人其萎美玉永

沉寶劔斯析聖心哀慟孤子泣血福祚長存恩光無歇
按誌敘自曾祖祖父及文幹之身蓋四世爲內官
矣王父上又加祖字初見于此唐書百官志開殿
使押五坊以供時狩一曰鷹坊二曰鵠坊三曰鷓
坊四曰鷹坊五曰狗坊而無鷄坊誌云遷鷄坊使
剪拂珍禽在闕自我是闕鷄之職也又云未幾息
車改栽接使唐六典尙寢局掌燕寢進御之次敘
總司設司輿司苑司燈四司之官屬司苑掌闕苑
種植蔬果之事是栽接使卽司苑所掌皆可廣唐
書六典所未備也又云開成五年詔遣充新羅使

迴榜累程潮退反風恐懼在舟疾從此起云云舊
唐書新羅傳開成四年又遣使朝貢以下無文新
書傳載開成五年鴻臚寺籍質子及學生歲滿者
一百五人皆還之不云遣使據誌所云恐是命文
幹護送還國而史畧之也誌云有子三人而下文
只義仙義方其一始卽適史氏之女也

尹府君朱夫人墓誌

石橫廣一尺五寸高一尺四寸二十一行行
十九字至二十五字不等正書在孟縣

唐故尹府君朱氏夫人墓誌銘

并序

曾口祖從家狀官告墜失不敘 府君諱澄其先望在

天水貫居秦州後子孫分散各處一方今權居孟州卽
爲河陽縣人也 公爲人端耿量雅恬和與人結交于
金不易一言道合嗎馬不追遠近欽風花城共美奈何
積善無慶天降其禍去開成四年告終于私第春秋六
十有七 夫人朱氏卽世廣陵郡人也笄年秦晉正配
歸于尹氏之門婦道禮儀不虧晨夕之孝接事舅姑能
善能柔和睦六親鄉閭傳祀奈何大運將至卧疾連綿
千方無効万藥無徵啓託聖賢其疾不愈口會昌四年
十月十九日終于私室春秋六十有三男女七人長子
廟諱慶新婦王氏次子廟諱禮新婦戴氏次子廟諱簡新婦賈

氏次子靈雅新婦王氏小子靈毅未婚長女十四娘夫
張氏十五娘端開氏嗣子等非法不行非禮不動□□
焉有丈夫之志兒女等叫天泣血五內分崩稱家有無
將□葬事卜得會昌四年十一月十八日葬于孟州河
陽縣安樂鄉□□村禮也恐年代□遠陵谷有遷刊石
爲文乃申銘曰

嗟乎尹君 生爲哲人 言無過失 花城共聞 干
金交結 恩義長存 招賢納士 禮法芳新 嗟乎
尹君 沒爲異人 嗣子擇地 安厝神魂 千秋萬
載 □□子孫

右尹君妻朱氏墓誌銘其序稱權居孟州卽爲河陽縣人及記葬地亦然按河陽升爲孟州係會昌三年此會昌四年正其初升之後故有是稱也此石係十年前從縣城內鑿井所出居人以爲搗布石縣學生薛清輔買得之雖其中有俗字如嘑盭之類然可因序中所記葬處以知此城地在唐時之爲安樂邠塢坎村則亦初非毫無所益也

孟縣志

周文遂墓誌

石高廣俱一尺四寸十五行
行約二十字正書在海寧州

唐故汝南周君墓誌銘

并序

君諱文遂字道從祖諱昂先父諱通君卽通之長子也
幼讀儒書長而習禮弱冠之歲咸舉所知內孝親姻外
穆僚友不能苦濫於琴酒乃縮職於監司三五年間榮
畧可辨何期未申公表奄卒壯年嗚呼霜劍摧鋒鳴琴
絕軀春秋卅有五大中二年三月十五日終于天長之
私館也以其年十月廿九日祔于先祖妣王夫人列域
以爲窀穸禮也娶鹽楊氏恭孝內誥譽案從禮一子三
歲名曰小君令弟二人曰文遇文造悼鶴原而遽絕誰
濟急難桐荆榦摧鴈行何續敢忘兄友銘誌弟恭固請
長詞用彰後紀者焉

銘曰

嗚呼周君廿命奚促三十五歲禍來衝福手劍摧鋒身
□□玉欲濟舟傾風前失燭一旦歸冥百齡何贖千歲
之中再生王國

按此誌不獨缺撰書人卽周氏里望周文遂所歷
何官皆不敘及但云給職監司終于天長私館而
已可謂疎畧甚矣書多別字外穆僚友穆當作睦
咸譽所知譽案從禮譽當作舉又娶宏農楊氏脫
農氏內孝親姻親可言孝姻何以言內孝耶不能
苦濫于琴酒苦濫二字不解此于上尹府君誌大
抵皆鄉里無識者所爲其措辭皆不可爲典要無

庸究詰祇以其爲唐蹟附錄於此

周公祠靈泉記

碑連額高九尺二寸八分廣三尺二寸二十四行行五十五字額刻潤德泉記四字並正書在岐山縣

鳳翔府岐山縣鳳栖鄉周公祠靈泉口并題奏狀及

勅批答

當府岐山縣鳳栖鄉周公祠舊有泉水枯竭冬季去十月口七日忽口大風其泉五處一時湧出各深一尺已來又有七處見出臣差府參軍郭鏐專就泉所檢驗得狀謹具泉水面方圓深淺分寸

五處泉面各方圓四尺已下各深一尺已來

七處小泉水面各方圓一尺已下各深三寸已來

右臣得縣鎮狀報有此靈泉差官勘覆事皆詣實詢諸
故老博訪里門咸稱此泉出必時泰歲豐者臣伏以周
公口人爰正禮樂勤勞周室克佐成王載在詩書揚于
風雅宜乎神用不測澤流無窮伏惟

陛下

叶德坤軋侔功造化節宣四序綏懷萬方由是地理呈
祥靈泉感應名標上善運屬和平不然何已涸之泉因
風復有此蓋彰於

聖德發自神功事出尋常義

同圖諒豈特撓之不濁乃鑿妍蚩積以成川方勞舟楫
也臣才非周邵時偶成康荷

恩渥而莫効涓塵

觀

休徵而空增喜躍謹具奏

聞伏請宣

付史官以光典冊無任歡賀悃欵之至其圖一面謹隨
狀奉進謹錄奏

聞謹奏

中書門下奏鳳翔觀察使奏當府岐山縣周公祠湧
泉出

右伏以川竭既爲時否泉生必表

政成况近

靈祠寔彰

聖德因風湧出當

風化

之所資口地澄清誠地經之載理近者栢樹復榮於

李觀蒙泉亦發於

神州考其祥經皆合

理代臣等商量望付史館書爲國華謹具如前奉十

二月八日

勅宜賜名潤德泉仍付所司

答詔

勅崔琪省所奏當府周公祠舊有泉水枯竭十口中因
風泉水五處一時湧出又有七處見出并畫圖進上
具悉朕聞致理之代地出醴泉蓋以澤可濟時德推上
善徵諸傳記最爲休祥朕以虛庸敢膺靈貺披口見瑞
省表增慙豈惟菲德致之亦卿循良所感臨軒嘉歎至
于再三今賜名潤德泉想宜知悉冬寒卿比平安好遣
書指不多及

謝賜 手詔表

右臣伏蒙

聖恩以臣當府所奏周公祠靈泉湧

出畫圖

進上示臣

手詔并賜名潤德泉者

紫泥緘啓

鴻澤光臨因

聖德以感通

詔微臣而褒獎捧戴無措兢惶失圖臣伏以

若

有至德及於山川神降休祥見於祠宇功宣潤下道叶
流謙臣所以披圖按諫考往按今明 靈化之式敷

彰 皇猷之無遠冀光

帝典用表祥經臣忝

守邦獲逢

理代不合蒙蔽輒具奏

聞豈謂俯迥

天睠乃賜嘉名特降綸言垂於不朽与日月而明並豈

金石之能移臣見令刻石紀年置之泉側爲一時標異
俾百代共觀無任屏營感抃之至謹奉狀陳謝以
聞謹奏

大中二年十一月廿日鳳翔隴州節度觀察處置等
使銀青光祿大夫檢校尚書右僕射兼鳳翔尹御史
大夫安平郡開國公食邑二千戶臣崔珙狀奏

周公祠靈泉湧出大五小七凡十二處觀察崔珙奏
狀勒石事在大中間石前刻奏狀中間宣宗批答后
刻珙謝表文詞宛至有盛世風書亦遒健有法且其
敘列大似漢人碑例而遜其古質耳如此等碑宋以

后恐不能得也

石罍
鐫華

鳳翔府岐山縣鳳棲鄉周公祠舊有泉水久竭大中
間泉忽湧出崔觀察珙奏狀亦水旱恒事耳宣宗手
詔褒嘉猶見下霽而史尙以無復仁恩察察為明短
之今世何可得也碑勒奏及手詔謝表筆氣蕭散有

褚河南意後書年月及銜復似柳如出兩手

金石
史

新唐書珙傳宣宗立以太子賓客分司東都起為鳳
翔節度使正在大中初年珙具奏靈泉之日何為削
其封郡食邑舊書所載與碑同

金石
錄補

蘇東坡云周公廟在岐山西北七八里廟後百許步

金石錄卷之三十三
有泉依山湧列異常國史所謂潤德泉世亂則竭者
也其名潤德者大中初因崔珙之奏而賜名也崔珙
狀奏珙爲鳳翔節度使而中書門下奏內但稱觀察
使者節度之職雖視觀察爲重然非軍旅之事陳奏
止稱觀察唐人章奏之式多如此也

潛研堂金石文跋尾

按陝西通志鳳翔府岐山縣周公廟有三一在縣
西郭街北一在縣西北十五里鳳凰山麓一在岐
山廟後舊有泉久竭唐德宗宣宗大中間忽有五
泉一時湧出賜名潤德泉卽此碑所載是也然通
志但云五泉而不及七泉亦畧也泉湧于十月口

七日則狀進奉勅當在十一月八日奉勅之後崔
珙表謝在十一月二十日今云奉十二月八日勅
宜賜名潤德泉此十二月是十一月之訛也泉久
竭復出且因大風而湧不可謂非祥異乃兩唐書
紀傳及五行志皆不載

陸君夫人孫氏墓誌

石高一尺三寸五分廣一尺五寸
十七行行十九字正書在富陽縣

唐陸君故夫人富春孫氏墓誌銘 并序

夫人吳大 皇帝十九代孫德之女也令淋有聞名傳
四德笄年歸于陸氏君名瑛有子三二男一女長男廩

誥次曰：憲詔並未有所娶女，則初笄之歲，未有所歸夫。人以大中四年遇疾，百藥無徵，口靈靡究。卽是歲仲夏月三日而終。春秋五十有七，男女號踊泣洟，摧咽親戚，悲噫日月，逾邁龜莖。叶從於其年季秋月末旬八日而安。厝富陽縣西十里上黃山，墓然而禮。墓則南登極峭，北達長衢，東西卽富春孫氏之山矣。慮年月將變，故列博記其誌銘。銘曰：

穆穆夫人，名傳四德。染疾不愈，歿歸泉路。蒼

芒山谷，冥冥九泉。恐年月口，誌銘列博。

唐大中四年九月廿八日記

此行字體特大

按此誌杭州府志金石所未收誌云安厝富陽縣西廿里上黃山墓又云祀墓則南登極峭北達長衢東西卽富春孫氏之山矣檢杭州府志山川卷富陽縣無上黃山名其在縣西二十里者但有一靈巖山而已惟縣南一十五里有陽平山太平寰宇記引地理志云吳武烈孫氏之所居也其祖種瓜于此有二仙人示其葬地卽此太平御覽又作陽城山爲孫氏所葬處今玩誌文富春孫氏之山或卽指此其云上黃山者或係當時土名而南與西之別十五里與廿里之不同則又記載之小異

也附識以備攷

金石萃編卷一百十三終